

北京圖書館 編

北京圖書館藏珍本
年譜
叢刊



第 35 冊

北京圖書館出版社

□ 北京圖書館 編

北京圖書館藏珍本

年譜叢刊

北京圖書館出版社

第 35 冊



第三十五冊目錄

元遺山先生年譜		一
元遺山先生年譜略		一四一
廣元遺山年譜		一四七
遜庵先生年譜		四〇五
菊軒先生年譜		四八七
許文正公考歲略續		五五七
許魯齋先生年譜		五八五
宋舒閬風年譜		六五五

元遺山年譜序

遺山先生金亡不仕幾三十年其舊都之感故君之思
幽憂慷慨之端悱惻纏綿之故不可明言者悉寓之於
詩顧其詩集分體而不編年其出處又皆散見于他書
閱之者但獵取其辭華剽襲其體格而已究未能得其
寓托之所在也乾隆四十六年辛丑歲客居揚州讀先
生之詩而愛之展卷之際身世漠不相關古今渺不相
接然而其情之可以移人者常一往而不可窮其誠之
可以動物者每三復而不能置茫茫然而來怲怲焉欲
動不自知其何心也旣而取金史本傳及文集排比而

類次之尋先生所遭之時與先生所處之境而後先生之出處本末有所考庶幾先生之詩之命意有所窺蓋其天懷之所感激偶於一物焉而伸之其孤憤之所鬱結偶于一事焉而發之身處於元而心在乎金言盡乎此而意繫乎彼細而案之隨處皆舊都之感故君之思也始知向之相賞於辭華體格間者爲已淺矣然先生出處本末天興甲午以前雖具金史本傳而自乙未以至丁巳往來於齊魯燕趙晉魏之間行踪靡定本傳及陵川墓銘皆未之詳蒐緝亦殊不易也於是仿魯氏之於少陵施氏之於東坡之例以年爲經以詩緯之爲先

生年譜一書癸卯在京師曾以草創質翁覃漢師師甚喜曰昔者亦擬爲此今得子書余可以不作矣子其勉旃嗣以牽於俗累稿凡累易終未成書及就官甯國稍得暇乃取舊稿并雜採金元史中州集歸潛志元文類泊金元人文集撰著之鉤稽校勘釐爲二卷以仕金時事爲上卷北渡後事爲下卷其可考者錄之其不可考者缺之後人議論之誣考證之疏者則爲辨之至于其詩之寄託之所在則未臆解聊自附于季卿元之之後惜道遠不獲就正於吾師也嘉慶元年歲在丙辰十一月朔歛凌廷堪序

元遺山先生年譜卷上



歙淩廷堪編

金章宗明昌元年庚戌先生生

生七月出繼叔父格

先生南冠錄引予以始生之七月出繼叔氏隴城府君迨大安庚午府君卒官扶護還鄉里時年二十有一矣

廷堪案先生以始生七月出繼叔氏中州集所謂先大夫字德明號東巖者先生本生父也郝經陵川集遺山先生墓銘所謂父格顯

武將軍兼行隴城令者卽叔氏隴城府君也
故先生集中爲第四女配婿祭家廟文稱德
明爲顯伯考贈中順大夫東巖府君稱格爲
顯考廣威隴城府君金史本傳據中州集謂
德明爲先生父但失載出繼一事耳至金詩
紀事則案中州集楊叔玉墓銘云先生姓元
氏字德明好問不敢名父故云爾金史中不
爲詳著漫從中州集所載亦以字書失實甚
矣山西舊志中每有金人元格詩始知德明
名格也竟以格與德明合爲一人較金史又

誤夫格爲隴城令德明隱居繫舟山不仕出處判然何不考之甚耶郭元釭全金詩亦以德明爲卽元格今悉正之

又案大安庚午衛紹王卽位之二年也上距章宗明昌元年庚戌凡二十一年故知先生

以明昌庚戌生也

慎言補後倣此

二年辛亥二歲

三年壬子三歲

四年癸丑四歲

始讀書

先生南冠錄引予自四歲讀書八歲學作詩今四十年矣

五年甲寅五歲

從父格官掖縣

廷堪案先生濟南行記云予兒童時從先隴城府君官掖縣嘗過濟南又濟南雜詩云兒時曾過濟南城暗算存亡只自驚四十二年彈指過只疑行處是前生再遊濟南在乙未七月則知格官掖縣時先生方五歲也

六年乙卯六歲

承安元年丙辰七歲

能詩

郝經先生墓銘先生七歲能詩太原王湯臣稱神童

二年丁巳八歲

學作詩

先生南冠錄引八歲學作詩

廷堪案墓銘作七歲能詩與此異南冠錄引爲先生自叙必不誤

三年戊午九歲

四年己未十歲

五年庚申十一歲

從父格官於冀州

郝經先生墓銘年十一從其叔父官於冀州學士
路宣叔賞其俊爽教之爲文

泰和元年辛酉十二歲

二年壬戌十三歲

三年癸亥十四歲

從父格官陵川受業郝天挺之門

郝經先生墓銘年十有四其叔父爲陵川令從先

大父學

金史隱逸傳郝天挺字晉卿澤州陵川人大原元好問嘗從學進士業貞祐中居河南耿耿自信寧困窮終不一至豪富之門年五十終於舞陽

元史郝經傳經字伯常其先潞州人徙澤之陵川祖天挺元裕常從之學金亡經往來燕趙間元裕每語之曰子貌類汝祖才器非常勉之世祖元年以翰林侍讀學士使宋館真州伯顏南伐宋懼以禮送歸明年卒謚文忠

廷堪案元史所稱元裕卽先生也初疑先

字裕之修史者採諸舊書成於倉卒誤脫之
字故趙復等傳又有元好問竟若兩人後者
張德輝等傳元裕之稱屢見豈先生北渡後
或改名爲裕歟未可定以爲史誤也

四年甲子十五歲

學爲時文

先生古意詩七歲入小學十五學時文

五年乙丑十六歲

本生父德明卒

先生中州集先人捐館後十年好問避兵南渡游

道日廣世始知有元東巖詩

廷堪案貞祐二年五月遷都南京是年爲甲
戌先生避兵南渡河年二十有五則前十年
先生十六歲

六年丙寅十七歲

七年丁卯十八歲

父格教之民政由陵川還秀容

先生南冠錄引十八先府君教之民政從仕十年
出死以爲民

又忻州天慶觀重建功德記曩余嬰年先大夫挈

之四方十八始一歸補言

八年戊辰十九歲

衛紹王大安元年己巳二十歲

秋試留長安是年長女眞生

先生送秦中諸人引子年二十許時侍先人官洛陽以秋試留長安中

郝經先生墓銘女五人長曰眞適進士東勝程思溫

廷堪案先生古意詩云七歲入小學十五學時文二十學業成隨計入咸秦秦中多貴遊